

Morning Regional Dogri News Bulletin, 17 July 2024

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

- डोडा जिले दे जंगली लाहके च आतंकवादियें दे खात्मे लेई सेना नै पैरा कमांडो, ड्रोन ते हैलीकाप्टरें दी मदद कन्नै अभियान गी तेज करी दिता ऐ।
- जम्मू-कश्मीर रियल एस्टेट नियामक-प्रादयिकरण नै जम्मू-कश्मीर च रियल एस्टेट पारदर्शिता गी बढ़ावा देने आस्तै पोर्टल रम्भ कीता।
- सी.बी.आई नै नीट अंडर ग्रैजुएट पेपर लीक मामले च दऊं होर आरोपियें गी गिरफ्तार कीता।
- सख्त सुरक्षा बंदोबस्तें बश्कार समूलचे देसै च मुहर्रम मनाया जा'रदा ऐ।

<><><><><><>

Doda-Encounter

डोडा जिले च आतंकियें ते सुरक्षाबलें बश्कार भखे दे टाकरे दौरान घायल होए दे 5 सुरक्षा बलें जिंदे च इक अफसर ते इक एस.ओ.जी जवान बी शामिल हा, शहीद होई गए न। एह टाकरा सोमवार संझा डोडा दे घने जंगलें च भखी पेआ हा। जम्मू ते होर खिते च इस हमले खिलाफ विरोध प्रदर्शन कीता गेआ।

जवानें दी शहादत उप्पर शोक प्रगट करदे होई होई इक्क भव्य पुष्पांजलि समारोह च शहीद जवानें गी श्रद्धांजलि अर्पित कीती गेई जेदे च जम्मू-कश्मीर दे उपराज्यपाल मनोज सिन्हा ते उत्तरी कमान दे कमांडर लेफ्टिनेंट जनरल एम.वी सुचिंद्र कुमार हुंदे सने केई मन्ने-परमन्ने दे लोकें हिस्सा लैता। डोडा जिले दे जंगली लाहकें च आतंकवादियें दे खात्मे लेई सेना नै पैरा कमांडो ड्रोन ते हैलीकाप्टरें दी मदाद कन्नै अभियान गी तेज करी दिते दा ऐ।

<><><><><><>

J&K Real

जम्मू-कश्मीर रियल एस्टेट नियामक प्राधिकरण नै जम्मू-कश्मीर दे रियल एस्टेट सेक्टर च इक महत्वपूर्ण गैह पुट्टदे होई अपने अधिकारिक पोर्टल दी शुरुआत कीती ऐ। पोर्टल .. गी राष्ट्रीय सूचना विज्ञान केंद्र जम्मू-कश्मीर आस्सेआ विकसिक कीता ऐ जेदा उद्देश्य रियल एस्टेट उद्योग च पारदर्शिता, जवाबदेही ते योग्यता गी बढ़ावा देना ऐ। एहदे च घर खरीदने आहले दी रक्षा करने ते डिवेल्पर्स प्रोमोटर्स ते रियल एस्टेट एजेंटें बश्कार निष्पक्ष बपार गी यकीनी बनाने दी बी बनस्था कीती गेदी ऐ। जम्मू-कश्मीर रियल एस्टेट अधिनियम 2016 मुजब 500 वर्ग मीटर शा मती या फही 8 इकाइयें शा मती क्षेत्रफल आहली बिक्री दे उद्देश्य आहली सारी अनाधिकृत कलोनियें गी जम्मू-कश्मीर रियल एस्टेट रेगुलेटरी अथारिटी कन्नै पंजीकृत होना लाजमी ऐ।

<><><><><><>

CBI-NEET

सी.बी.आई नै नीट-यू.जी पेपर लीक मामले च दोआर आरोपिये गी गिरफ्तार कीता ऐ। हजारीबाग च राष्ट्री टेस्टिंग एजेंसी दे ट्रंक थमां नीट-यू.जी परीक्षा दा पेपर चोरी करने दे आरोप च झारखंड दे बोकारो च रहने आहले इक्क आरोपी गी पटना थमा गिरफ्तार कीता गेआ। हजारीबाग शां गिरफ्तार इक्क होर जने उप्पर पेपर चोरी च मदद करने दा दोष ऐ। एजेंसी नै अजे तगर इस मामले च शामिल 14 दोषिये गी गिरफ्तार कीता ऐ जेदे च झारखंड दे हजारीबाग दे इक स्कूल दे प्रिंसीपल ते वाइस प्रिंसीपल बी शामिल हे। सीबीआई नै बक्ख-बक्ख राज्य पुलिस बल इस मामले दी जांच करा'रदियां न।

<><><><><><>

Sampoorna

रामबन जिले दे खाड़ी ब्लाक दे बक्ख-बक्ख वार्डे दे करसाने गी आकांक्षी ब्लाक प्रोग्राम तैहत सम्पूर्णता अभियान दौरान करसाने गी बक्ख-बक्ख सरकार प्रायोजित राई-बाई स्कीमें बारे जानकारी दिती गई। इस दौरान राईबाई विभाग नै बक्ख-बक्ख स्कीमें जियां सायल हेल्थ कार्ड किसान क्रेडिट कार्ड ते प्रधानमंत्री किसान योजना बारे जानकारी सांझी कीती। इस दौरान कृषि विभाग नै खासी ब्लाक दे हर इक करसाने दी राई-बाई आहली जमीन थमां मिट्टी दे नमूने दी बी जांच कीती ते फही ओहदे मताबक सायल हेल्थ कार्ड बंडे। हर रोज 50 शा 60 करसान इस चाल्ती दे जागृति प्रोग्रामे थमां लाह ठोआंदे न। स्हाड़े संवाददाता कन्ने गल्ल करदे होई रामबन दे राईबाई सरबंधी एक्सटेंशन अधिकारी होरे आखेआ।

<><><><><><>

Sect. Cooperative

सहकारिता सचिव बबीला रकवाल होंरें सुंदरबनी ब्लाक दी बाजाबाईं थाहर इक जनसंपर्क कार्यक्रम दा सरिस्ता कीता। कार्यक्रम सरकार ते जनता बश्कार सिद्दी गल्लबात ताईं इक मंच दे तौरा पर कम्म करदा ऐ जेदे च नेकें महत्वे आहले मुद्दे पर गल्ल-कत्थ कीती गई। इस मौके राजौरी दे डी.सी ओम प्रकाश भगत ते होर दुए आला अफसर बी उत्थे मौजूद हे। सचिव होंरें मकामी लोकें आस्सेआ पुट्टे गेदे मुद्दे गी हल करने बक्खी बचनबद्धता दोहराई। उनें इस गल्ला गी जोर देइये आखेआ जे सरकारै दी सब्बनें शा बड्डी प्राथमिकता एह् जकीनी करना ऐ जे आम जनता गी बुनियादी सहूलतां ते सेवा बड़े गै माहिराना ढंग्गै नै समेबद्ध ते पारदर्शी तरीके कन्नै उपलब्ध करोआइयां जान।

<><><><><><>

Amarnath

इस बरे दी चला'रदी श्री अमरनाथ जी दी सालाना जातरा च अज्ज जम्मू दे भगवती नगर यात्री निवास आधार शिविर थमां 3 जहार 740 तीर्थ यात्रुएं दा इक्क होर जत्था अगड़ी यात्रा लेई रवाना होआ। 127 गड्डियें दे काफले च 2 जहार 734 मर्द, 952 महिलां, 9 बच्चे, 39 साधु ते 6 साध्वियां शामिल न। इंदे चा 1,435 बालटाल लेई ते 2,305 पहलगाम आधार शिविर लेई रवाना होए।

<><><><><><>

Muharram

अशारा ई-मुहर्रम अज्ज समूलचे देसै च धार्मिक श्रद्धा ते जोश जज्बे कन्नै मनाया जा करदा ऐ। एह् ध्याड़ा पैगम्बर मोहम्मद हुंदे दोत्रे हजरत इमाम हुसैन ते उंदे साथियें दी शहादत दे चेतें च मनाया जंदा ऐ। हजरत इमाम हुसैन ते उंदे साथियें कबीला दी लड़ाई च सच ते न्या लेई कुर्बानी दिती ही। इस मौके देस भरै च ताजियें दे जलूस कड्डे जा करदे न ते धार्मिक बैठकें ते मजसिलें दा बी सरिस्ता कीता जा करदा ऐ। इंदे च कर्बला दे शहीदें दी शहादत दा जिक्र कीता जंदा ऐ। इस मौके सुरक्षा दे सुददे बंदोबस्त कीते गेदे न।

<><><><><><><><>

LG-Sinha

उपराज्यपाल मनोज सिन्हा होरें मुहर्रम दे 10में ध्याड़े अशूरा दी पूर्व संझा पर हजरत इमाम हुसैन हुंदे आस्सेआ दिते गेदे बलिदान गी चेतता कीता। अपने सनेअ् च एल.जी होरें आखेआ जे एह् मौका हजरत इमाम हुसैन हुंदे बलिदान ते उंदियें महान शिक्षाएं दा चेतता नोआंदा ऐ। एह् ध्याड़ा हजरत इमाम हुसैन हुंदे आस्सेआ दस्से गेदे बरोबरी, भाईचारे, दया ते न्या दे आदर्श बक्खी अपने आप गी परतियें समर्पित करदे दा ऐ।

<><><><><><><><>

Mission-Shakti

समाज कल्याण विभाग जम्मू नै आंगनवाड़ी केंद्र निटको लेन तालाब तिल्लो जम्मू च इक असरदार जागरूकता कार्यक्रम दा सरिस्ता कीता।

कार्जक्रम दा मकसद भटेयाली ते न्याणें गी अपना दुध पलेयाने आहिलयें माताएं दे पोषण ते प्रधानमंत्री मातृ वंदना योजना दे फायदें बारै जागरूकता फलाइयै महिलाएं गी बाइखितयार बनाना हा। एहदे कन्नै गै भटेयाली महिलाएं गी गर्भाभवस्था दौरान लोइचदे पोषण ते आराम दे महत्व बारै शिक्षित करना बी कार्जक्रम दा मकसद हा। कार्जक्रम च संतुलित रूट्टी दे महत्व दी भूमिका पर बी लो पाई गई। इस मौके पोषण ते शिशु किटें गी तकसीम करने दे कन्नोकन्नी भटेयाली महिलाएं दे सोआलें दे जवाब बी दिते गए।

<><><><><><>

DL-Poonch

पुंछ दे डिप्टी कमिशनर यासिन एम. चौधरी होरें कल पुंछ दे डाक बंगले च इक मीटिंग लोआइये औंदे स्वतंत्रता दिवस लेई कीती जा'रदियें तैयारियें दा जायजा लैता। डी.सी होरें मुतलका मैहकमे गी समें पर सब्बै बंदोबस्तें गी तोड़ चाढ़ने दे निर्देश दिते। स्वतंत्रता दिवस दा मुख समारोह खेड्ड मैदान च आयोजित होग जित्थे मुख परौहने झंडा चाढ़ियै ते मार्च पास्ट थमां सलामी लैंगन। डी.सी होरें प्रशासन गी मुख समारोह आहली थाहर ते ओहदे नेइमे इलाकें च साफ-सफाई मुहिम चलाने ते कार्यक्रम दौरान पानी ते बिजली दी सप्लाई गी बिजन कटौती दे यकीनी बनाने दे बी निर्देश जारी कीते।

<><><><><><>

Plantation

जम्मू बागवानी विभाग दे डरैक्टर चमन लाल शर्मा होरें कल कठुआ दा दौरा लाया ते समग्र कृषि विकास कार्यक्रम तैहत कठुआ जिले च रूख-बूहटे लाने दी मुहिम दी शुरूआत कीती।

इस दौरान करसानें गी अम्ब दे लौहके-लौहके बूहटे दिते गए। एहदे बारै सहाड़े संवाददाता कन्नै गल्ल करदे होई डरेक्टर होरें गलाया।

<><><><><><>

DDC-Reasi

रियासी दे जिला विकास कमिशनर विशेष महाजन होरें जिले च स्कूली शिक्षा मैहकमे दी स्थिति ते कारकरदगी दा जायजा लैने आस्तै इक्क बैठक सददी। बैठक दौरान मुख शिक्षा अधिकारी मुश्ताक अहमद होरें शिक्षा क्षेत्र दी व्यापक जानकारी दितीं अपने संबोधन च श्री महाजन होरें शिक्षा दे महत्व पर जोर पाया ते शिक्षा दे कन्नो-कन्नी पोषण, टकोहदा करिये स्कूलें च दपैहरी थोने आहली रूट्टी मिड-डे मील दे महत्व गी उजागर कीता। उनें निर्देश जारी करदे होई आखेआ जे जिनें स्कूलें च मिड-डे मील दा प्रावधान ऐ ओह राई-बाई मैहकमे दे सहयोग कन्नै किचन गार्डन स्थापित करन।

<><><><><><>